

# 台灣答喙鼓-追追追

作者：蔡勝德 102.12.11

主角:秦妖嬌(甲)、祝緣投(乙)

甲:千江月 千里帆 千重山 千里江山 我上水 萬里月 萬里城 萬里愁 萬里煙 萬里風霜 我上妖嬌。啊，追追追……。

乙:喂，你敢毋是妖嬌的?當頭白日你是佇墓仔埔咧放炮-欲「吵死人」喔!阿無，你是咧追啥貨?

甲:緣投的，阿你哪會佇遮?我拄才看著有人佇溪仔邊咧偷倒糞埕，我敲電話共管區的報案了後，就共伊追對遮來，哪知會拄著你?是講遮是甚麼所在，哪會鬧熱滾滾?

乙:無啊，你是共我當作彼个嫌疑犯喔?遮是答喙鼓的現場，咱先共逐家問好一下才閣講。

甲 \* 乙:我是秦妖嬌、我是祝緣投，逐家平安、逐家好。

乙:是講偷倒糞埕這款代誌，你交予警察去處理著好，憑你三腳貓的功夫，若著親像阿公仔咧娶某仝款-遐呢「加婆」咧?

甲:hóo!你毋通看貓仔無點呢，本姑娘今也是朴子溪巡守隊的組長呢!

乙:虎躡佇深山啦，有話緊講，莫咧歹戲拖棚!

甲:水源污染足煩惱，糞埕清彩烏白倒，若無好好來宣導，環境安全

哪會好?若欲像你食好做輕可,我看咱的溪仔水一定是烏閣濁(lô)。

乙:有那麼嚴重嗎?(學阿扁仔總統講話的聲)阿無,你講欲按怎做才好?

甲:本姑娘三帖秘方送予你,若共伊做落去,環境污染的病就好離離。

乙:啥秘方?緊講,莫閣佇遮賣藥仔矣!

甲:第一帖,拜託逐家糞掃愛分類,毋通烏魯木齊囡做堆,「一般」、「資源」、「潘桶」愛分予開,千萬毋通做一个垃圾鬼。

乙:是講,糞掃分類敢有甚麼好空的?

甲:糞掃分類做予好,環保稽查袂囉嗦,焚化爐仔無出錯,省錢衛生免煩惱。遮叫做一空掠雙隻-足「好空」,你知無?

乙:你猶閣有啥撇步?

甲:第二帖,資源回收靠逐家,銅管字紙揀來賣,保護環境莫相推,順繼趁一寡所費,轉去友孝恁娘孀(lé)。

乙:做環保閣會使趁外路仔,真正是一兼二顧,摸蚶仔兼洗褲呢,足好空呢,你趕緊閣繼續共講落去。

甲:第三帖,為著囡孫恰子弟,破壞環境愛取締,若是出賣河川和土地,著愛掠來教示做狗爬。

乙:喔!你這個妖嬌的婿姑娘,看袂出你閣誠有叫數(kiò-siàu)呢!真正是黑矸仔貯豆油-「無底看」喔!

甲:毋是我舅跤,這寡歹心烏漉肚、欲死著初一、十五的人,一定愛

予 一个教示，若無世間著無天理!喂!喂!我是，好，我隨來(甲接著一通緊急的電話)

乙:看袂出你事業做遮大，電話閣響袂煞!阿是啥欲揣你?

甲:歹勢啦!管區的敲電話來講偷倒糞掃彼个人，今也覘佇西濱快速道路邊仔的甘蔗園內面，我欲緊來鬪追矣!

乙:好，按呢咱莫閣講矣，我嘛欲恰你做伙來追彼个賊仔脯，衝喔!(甲、乙做欲做伙走的動作)

甲 \* 乙:秦妖嬌、祝緣投，落台行禮!

